


# PONG KAPONG

Ditulis:

Kadir Umbat




borneo literature bureau

PLT


# PONG-KAPONG

GAMBAR DIGAGA  
Krisno Jitab



BORNEO LITERATURE BUREAU

© Borneo Literature Bureau, 1974.  
(Dipegai Perintah Sarawak enggau Sabah),  
P. O. Box 1390,  
Jalan Tun Haji Openg,  
Kuching, Sarawak,  
Malaysia.



PERPUSTAKAAN DBP/SAR.	
No. Kelas:	
No. Perolehan: 12373	
Tarikh:	T.T.

Dichelak

Lee Ming Press

# RURUN CHERITA

GENTE RAN

LAMBAR

**PONG-KAPONG** Ditulis: Kadir Umbat

Meri Anak Mandi .....	1
Pindah .....	2
Ngambi Pong-Kapong Pulai .....	3
Nitah Raja .....	9
Ajar Ikan Juak .....	10
Beranak .....	19
Bebali Nyadi Remaung .....	20
Padi .....	21

**ANDA MARA** Ditulis: G Nunong Madang

23

# PONG-KAPONG

Ditulis: Kadir Umbat

## MERI ANAK MANDI

NYADI TU pun bansa Iban nemu meri anak mit mandi ba batang ai, sereta enggau nemu bepenti maia bini ngandong leboh datai ba maia ke patut alai bepenti. Penemu tu datai ari burong Pong-kapong. Penatai turun-menurun Pong-kapong ari Kalachai bebini ngambi Dara Siak, beranak ka Bandar Rirang, bebini ngambi Endu Endat Rumput Kerejai, beranak ka Pong-kapong, bebini ngambi Dara Satu datai ari punggu nyatu tapang.

Nyadi leboh sida menyadi bedua utai, dia Bandar Rirang beruntong ka puchong pengajih enggau batu tali kemarau. Nya pesaka iya. Pesaka nya dikembuan Pong-kapong. Nya alai enti maia iya bemunyi samoa kayu ke tau bebuah lalu bebunga laban iya tau ajih. Musin maia kemarau panjai, nya pan ari ator iya ga, laban iya tau ajih. Nunda ka jerita dalam Pulau Borneo tu, semina dua iko melaki-bini nya aja burong Pong-kapong ke tau ngajih ka kayu bebuah.

Nyau kelama seduai melaki-bini udah begulaj, dia bini iya lalu betelu sigi. Nyau datai ba maia iya ke mechah, nyadi mega anak seduai. Nyau datai ba maia nganjong anak

mandi ka batang ai, lalu dianjong seduai mandi. Datai di ai lalu disungga ka indai iya ga anak nya. Leboh iya nyungga ka anak mit nya, enda mukai-mukai datai deh ikan juak lalu nangkap kaki anak mit sapiak. Kaki iya lalu putus. Kaki nya dikumbai ikan juak indu utai meda iya kilap-kilap dalam ai. Anak mit nya lalu dibai apai seduai indai iya pulai ka rumah. Nama deh anak seduai nadai kaki sapiak. Diubat seduai dia, nyau kelama gerai ga kaki anak seduai. Dia deh tapa kaki nyau tumboh baru, tang iya lalu pandak ari sapiak. Timpang deh kaki iya nya tadi.

#### PINDAH

PONG-KAPONG seduai bini iya lalu bejako diri sama diri. "Kitai tiga menyanak tu enda tau diau ba menoa tu agi. Nama deh penyadi, enti maia anak tua mandi lalu ditangkap ikan juak, tentu iya mati. Manah kitai tiga rari ari Pulau Borneo tu," nya jako laki iya.

"Anang guai dulu," pia ko bini iya, "enti kitai angkat ari tu, tentu nadai orang tau ngajih ka kayu buah tau bebuah. Nyai alai enti nadai buah, tentu ga nadai ka pengidup samoa utai idup di menoa tu," pia ko bini iya. "Enti anak tua deka mandi, beri mandi ai dalam bungkong kayu." Pia ko penyadi runding seduai iya.

Anak nya pan nyau besai, apai seduai indai lalu ngajar iya pasal samoa utai. Seduai enda ngasoh iya mandi ngagai batang ai enggai ka iya tulih ka penusah baka ke dulu, ditangkap ikan juak. Baka ke ngasi ga gamal anak seduai ka jako ajar. Enda lama udah nya indai iya lalu betelu baru. Telu iya sakali tu tiga igi.

Anak iya nya tadi nyau mansang besai-kabesai. Iya

seruran deka mandi ka batang ai, tang apai seduai indai iya seruran ngerara iya berari-ari. Tang deh anak nya selalu deka ngelaban jako apai seduai indai iya.

Udah nya baru seduai berunding baru. "Enti bakatu, anak tua tu ngelaban jako. Timbun ngapa iya bebadi mati ditangkap ikan juak. Manah kitai angkat ari tu. Anak tua pan udah ga tegar terebai. Pasal telu tiga igi nya, kati ko enda tinggal, nadai chara mai. Lak ka iya burok ngapa dia meh," pia ko pengabis runding seduai.

Nyau hari siti, angkat deh bisi burong tok-tarau semak dia. Seduai lalu madah ka diri deka angkat ka Pulau Sumatra ngagai burong tok-tarau. Burong tok-tarau lalu nesau burong bukai ke bisi semak dia, madah ka burong Pong-kapong deka pindah. Iya ke betesau nya tadi enggau insak enggau sabak. Dia samoan bansa utai menseput lalu betesau magang-magang dalam Pulau Borneo. Sida lalu begau madah ka diri nadai penyadi, nadai tau ngajih ka kayu tau bebuah, enti Pong-kapong nadai agi diau di Pulau Borneo. Bisi nya nyabak, bisi semina nukong betati ka buah nadai agi ka pengidup. Sida Pong-kapong tiga menyanak lalu nyau pindah ngagai Pulau Sumatra.

#### NGAMBI PONG-KAPONG PULAI

NYAU KELAMA udah nya, nyau tusah magang samoan utai idup. Samoa burong makai tarok kayu, samoan jelu bepakai ka urat kayu enggau tanah. Samoa ikan bepakai ka amboh. Nyau sampai sataun udah nya, dia samoan utai idup nyau mansang kurus magang, laban kayu tak nadai bebuah. Nya baru bansa mensia ngempuru ka samoan utai menseput. Udah sida sampal datai magang, dia mensia lalu bejako nanya ka runding bala maioh.

"Nya alai enti samoa kitai ke ditu nadai tau ngajih ka kayu tau bebuah, manah kitai ngambi Pong-kapong pulai barunggagai menoa kitai tu," pia ko jako Anak Mensia. "Nya alai sapa kitai tau ngambi Pong-kapong pulai? Menoa ke endor iya diau udah temu, enti betul nitih ka berita ditusoi Tok-tarau, menoa nya jauh, nyau meraka tasik. Kami Anak Mensia tu enda ulih datai din, laban kami nadai bangkong. Nya alai samoa kitai ke ditu patut nyaut ka diri empu magang," ko Anak Mensia.

Bansa ikan ai tabar dulu nyaut. "Kami bansa ikan ai tabar tu enda ulih, laban kami enda tau meraka ai tasik masin. Enti kami mereka tasik, kami parai."


Udah nya baru bansa ular nyaut. "Kami bansa ular tu enda tau, laban kami nadai kaki, enda tesemerai ka ai tasik."

"Nyadi bansa kami ke bisi kaki," pia ko Menarat seduai Bandau, "kami endang enda makai buah, nadai beguna ka Pong-kapong. Tak salah munyi jako didinga kita, tak nganti kita ke kurus nya mati, nya baru kami makai buot kita," ko seduai.

Ninga jako Menarat seduai Bandau munyi nya, lalu pedis magang ati orang maioh ngagai seduai. Orang lalu nyumpah menarat. "Kita menarat enda tau niki kayu, enti bansa kita bisi niki kayu, kita laboh," pia ko jako sumpah orang maioh. Sumpah nya lagi bisa sampai ka saharitu.

Udah nya baru bansa jelu nyaut. "Kami jelu tu nadai tesemerai ka ai tasik. Semina naka nyemerai sungai kami tau, deh nyau asai ke deka lemas," pia ko jelu.

Udah nya baru bansa burong nyaut. "Kami burong tu terebai amat tau, tang enti tasik besai diperaka, nadai alai ngetu inggap, kami enda ulih," ko sida.



**MAKLUMAT SELANJUTNYA BOLEH DIDAPATI DI:**

**KOLEKSI BORNEO**

Pusat Dokumentasi Melayu Tun Hamdan Sheikh Tahir  
Dewan Bahasa dan Pustaka Cawangan Sarawak,  
Jalan Tun Datuk Patinggi Haji Abdul Rahman Yaakob,  
Petra Jaya,  
93050 Kuching, Sarawak.

Telefon: 082 – 227 000  
Faksimile: 082 – 227 088  
E-mel: [eborneo@dbp.gov.my](mailto:eborneo@dbp.gov.my)

**“Memelihara Warisan Memupuk Wawasan”**

